



Inatsisartut

Aningaasaqarnermut Ataatsimiititaliaq
Finansudvalget

Ulloq/Dato: 30. marts 2010
J.nr.: 01.31.06/10-00467

Aningaasaqarnermut Naalakkersuisoq

Aningaasaqarnermut Ataatsimiititaliap suliaq nr. 01.31.06/10-00467 pillugu ataasinngornermi ulloq 29. marts 2010 aalajangiineranik Naalakkersuisunut ilisimatitsineq.

2010-mut kiffartuussinissamik aningaasaliissutit pillugit Sisimiut Fish ApS-imik isumaqatigiissut

Naalakkersuisut **inassutigaaat,**

- kiffartuussinissamik isumaqatigiissut ilanngunneqartoq 1.250.000 kr.-inik aningaasartaqartoq taamak isikkoqartillugu akuerineqassasoq, aamma
- 1.250.000 kr.-it konto pingaarnermit 20.11.72-imit, Illoqarfiit nunaqarfiillu ilaanni immikkut ittumik suliniutissatut sillimmatinut tunngasumit, aaneqassasut.

Aningaasaqarnermut Ataatsimiititaliap oqaaseqaatai

2010-mi kiffartuussissutissat pillugit Royal Greenlandimut isumaqatigiissut Aningaasaqarnermut Ataatsimiititaliamit ulloq 23. december 2009-mi akuerineqarpoq. Suliaq 01.31.06/09-00455 innersuussutigineqarpoq.

Ataatsimiititaliap taamani aalajangiinerani Aningaasaqarnermut Ataatsimiititaliaq ilaatigut ima allappoq (Immikkoortut ataasiakkaat ersarissunngortinneqarput):

”Piffissaq qinnuteqaammik nassitsiviusoq inuiaqatigiit ineriartortinneqarnerat eqqarsaatigalugu naalakkersuinikkut qulliunerusumik anguniakkat iluanni kiffartuunneqarnissamik isumaqatigiissutit naapertuunnerpaamik aqqqissuunneqarnissaat pillugu ataatsimiititaliap Naalakkersuisunik oqaloqateqarnissaanut periarfissaqartitsinngilaq.

Aningaasaqarnermut Ataatsimiititaliap paasisinnaavaa kiffartuunneqarnissamik isumaqatigiissutit eqqarsaatigalugit qulliunerusumik aningaasatigut killiliussat aningaasanut inatsisip akuersissutigineqarneratigut aatsaat pissarsiarineqarsimammata.

Ataatsimiititaliali taamaattoq kaammattuutigissavaa, Naalakkersuisut siunissami Naalakkersuisut isumaqatigiinniarnissanut aallaavissaasa suliarineqarnissaat sioqqullugu Ataatsimiititaliamik oqaloqateqartarnitik aallartitalissagaat, aallaavittut kiffartuussinissamik isumaqatigiissutit atuutilernissaat kingusinnerpaamik qaammatinik pingasunik sioqqullugu, taamaalilluni isumaqatigiissutip ilusilersorneqarnera eqqarsaatigalugu Ataatsimiititaliamit kissaataajunnartut isumaqatigiinniarnertit aallartinnginnerini Naalakkersuisut isumaliutaannut ilaareersinnaaniassammata.

...

*Ataatsimiititaliap tamanna tusaatissatut tiguaa. Ataatsimiititaliali kontumi pingaarnermi aningaasaliissutit eqqarsaatigalugit pingaarnersiulluni tulleritaaarisimaneq naatsorsuutigineqartoq taamaallaat akuerisinnaavaa **piumasaqaatitaliullugu, Naalakkersuisut** immikkoortukkuutaartumik pilersarusiornerup aamma ilinniartitaanermi, nuttarnersitsinissamik kiisalu suliamik allamik tigusaqarsinnaanermut ilinniartitsinissamik suliniutit tigussaasut eqqarsaatigalugit suleqatigiinnerit **siumut ingerlanerat pillugu qaammatikkaartumik Ataatsimiititaliamut nalunaaruteqartarpat.** Ataatsimiititaliamut pingaaruteqarluinnarpoq nunap immikkoortuini assigiinngitsuni*

inuussutissarsiornikkut ilinniartitaanikkullu periarfissat eqqarsaatigalugit ineriartorneq nukittorsarniarlugu iluarsaaqqinnerni aallartinneqarsimasuni siumut ingerlasoqarneranik 2010-p ingerlanerani takusaqartoqarsinnaanissaa.

...

Aningaasaqarnermut Ataatsimiititaliap aalajangernera

Naalackersuisut inassuteqaataat Aningaasaqarnermut Ataatsimiititaliap akuerai makkuninnga piumasaqaatitalerlugit:

- 1. RG pisussaaffilerneqassasoq nipisat tunisaanerisa nalaanni tunisassiorfiit tamanna akornutissaqanngippat ammatiinnarneqarnissaannut.*
- 2. Isumaqaatigiissummi § 5.2-mi aningaasat ingerlaarnerannik nalunaaruteqartarnermut tunngasoq pisortat siulersuisullu akissarsiaqartinneqarnerannut aningaasat qanoq amerlatigisut atorneqarsimanerannik paasissutissanik immikkut ilaqartinneqartassasoq.*
- 3. Isumaqaatigiissutip §-iisa siullianni immikkoortumi kingullermi "allanilluunniit" oqaasertaliisimaneq erseqqissarneqassasoq. Pisariaqarpat imatut allatut oqaasertaliineq "allanilluunniit nammineq pisuussutiginnisamik" taarsiullugu atorneqarsinnaavoq."*

Tamanna tunngavigalugu kiffartuussinissamik isumaqaatigiissut suliami matumani pineqartumi atorneqartup qaammatillu pingasut matuma siorna ataatsimiititaliamit itigartinneqartup assinga Naalackersuisut atormassuk ataatsimiititaliamit *assut tupigusuutigineqarpoq*. Taamaalilluni Aningaasaqarnermut Ataatsimiititaliaq akuersissappat immikkoortut pingasut siuliani issuarneqartut kiffartuussinissamik isumaqaatigiissummi matumani pineqartumi aamma ilannguneqassapput.

Tamatuma saniatigut suliami matumani isumaqaatigiinniarnissamut tunngavissiunnginnermi kaammattuutigineqartut Naalackersuisut ataatsimiititaliamik oqaloqatiginnissimannginnerat **naammagisimaanngikkini** Aningaasaqarnermut Ataatsimiititaliap oqaatigissavaa. Kaammattuut matuma kingorna malinneqassasoq ataatsimiititaliamit naatsorsuutigineqarpoq.

Tamatuma saniatigut nunaqarfiit pillugit misissueqqaarnermik suliarinninnerup killiffia pillugu nassuiaammik ataasiinnarmik ataatsimiititaliaq maannamut tigusaqarpoq. Nassuiaatip tulliaata piaartumik tiguneqarnissaa ataatsimiititaliamit naatsorsuutigineqarpoq, tamatumalu kingorna kissaatigineqartut **qaammatikkuutaartumik** nassuiaatip naatsup tigusarnissaa naatsorsuutigineqarluni.

Naalackersuisut isummernissaannut tunngavissiami tusarniaaneq pillugu immikkoortumi allassimavoq oqaaseqaatit attuumassuteqartut Inuussutissarsiornermut aamma Aningaasaqarnermut Naalackersuisoqarfimmeersut ilanngunneqartut. Tamanna Missingersuusiornermut malittarisassani aalajangersakkanut naapertuutinngitsoq Aningaasaqarnermut Ataatsimiititaliaq isumaqarpoq. Naalackersuisoqarfiit oqaaseqaataat ilanngunneqanngikkunik oqaaseqarfigineqartussaapput, taamaalilluni Naalackersuisoqarfiit akornanni isumaqaatigiinngissutaasinnaasunut Naalackersuisut Aningaasaqarnermullu Ataatsimiititaliaq isummerninnaaqullugit. Tamatuma saniatigut isumaqaatigiissutini taakkunani kukkunerit ikilisinneqarnissaat siunertaralugu kiffartuussinissamik isumaqaatigiissutimik suliaqarluni piareersarnermi Naalackersuisut inatsisileriffiata akuutinneqartarnissaa sakkortuumik isumaliutigineqartariaqarpoq.

Isummernissamut tunngavissiap naggataata tungaani allassimavoq nunat immikkoortuinut pilersaarutit nunaqarfinni sorlarni tunisassiorfiit tulluarnerpaamik ingerlaannarnissaasa naliliiffigineqarnissaannik imaqarnissaat ilimagineqartoq, taakkununnga ilanngullugit sumi kiffartuussinissamik isumaqaatigiissuteqartoqassanersoq aammalu atugassarititat piumasaqaatillu sorliit atorneqassanersut. Tamanna nunaqarfiit pillugit misissueqqaarnermik suliap killiffia pillugu ilisimatitsissummut (ullulerneqarsimanngitsumut) Inuussutissarsiutinut Suliffeqarnermullu Naalackersuisumit ataatsimiititaliap ungasinngitsukkut tigusaanut naapertuuppiangilaq.

Aalajangiinikkut matumuunakkut kontomi pingaarnermi 20.11.72-imi, Illoqarfiit nunaqarfiillu ilaanni immikkut ittumik suliniutissatut sillimmatinut tunngasumi, aningaasat tamarmik 2010-mi atorneqareerput. Ukiup aatsaat imaalineri eqqarsaatigalugu tamanna aarlerinartutut Aningaasaqarnermut Ataatsimiititaliamit isigineqarpoq. Taamaattorli aalisarnermik inuussutissarsiutip imminut napatinnerulernissaa sulissutigineqartariaqartoq Naalakkersuisunut eqqaasitsissutigissallugu ataatsimiititaliaq pissutissaqarsorivoq, taamaaliornikkut aatsaat immikkorluinnaq pisoqartillugu kiffartuussinissamik isumaqatigiissutit aqutigalugit aalisarnermut tunisisarnermullu tapiissuteqartoqarsinnaaqqullugu. Ajoraluartumilli illuatungerluinnaanut ingerlasoqarsorinarpoq, tamannalu Naalakkersuisut nipangiinnarlutik tusaatissatut tiguinnartariaqanngilaat.

Kiisalu suliami 01.31.06/10-00466-imi aalajangiinini, aalajangiineq matumani pineqartoq ilutigitillugu saqqummiunneqartumi, ataatsimiititaliap innersuussutigissavaa, tassa tunngaviusumik isummersuutit aalajangikkami tassani allassimasut suliami matumani pineqartumi aamma atuummata.

Ataatsimut isigalugu kiffartuussinissamik isumaqatigiissutinik iluarsisanik kiisalu siuliani oqaaseqaatinut oqaatiginiakkaminnik Naalakkersuisut nassitsinissaat ataatsimiititaliamit utaqqimaarneqarpoq.

Aningaasaqarnermut Ataatsimiititaliap aalajangiinera

Siuliani allassimasutut paasinnilluni Naalakkersuisut inassuteqaataannut isummernissani Aningaasaqarnermut Ataatsimiititaliap **kinguartippaa**. Naalakkersuisut kalaallisut danskisullu akissuteqaataat aalajangikkap matumani pineqartup nassiunneranit sapaatip akunneri pingasut ingerlaneranni tiguinissaa ataatsimiititaliap naatsorsuutigaa.

Aningaasaqarnermut Ataatsimiititaliaq sinnerlugu

Naaja Nathanielsen
Aningaasaqarnermut Ataatsimiititaliami siulittaasoq